



SUBMISAUN HUSI
DEPARTAMENTO DE SOCIOLOGIA,
FACULDADE DE CIÊNCIAS SOCIAIS,
UNIVERSIDADE NACIONAL TIMOR LOROSA'E,
BA PARLAMENTU NASIONAL
KONA-BA
PROPOSTA ORSAMENTU JERAL ESTADO TINAN-2025.

Konteúdu:

- I. Introdusaun
- II. Análize ba Orsamentu Jeral Estado tinan-2025
- III. Fundo Petrolíferu no ameaças Precipísus Fiskal
- IV. Rekomendasaun

I. Introdusaun

Departamento de Sociologia, Faculdade de Ciências Sociais, Universidade Nacional Timor Lorosa'e, konsidera katak Proposta Orsamentu Jerál Estadu (OJE) 2025 ne'ebé IX Governu Konstitusionál prepara no apresenta ona ba Parlamentu Nasinál (PN) hodi debate tuir kalendáriu ne'ebe aprova ona, nu'udár ran ne'ebé sustenta Estadu, ekonomia no povo ninia moris.

Papél ida husi sosiedade akadémika nian mak kontribui ideia krítiku no konstrutiva liga ba asuntu importante sira kona-ba Estadu no povo ninia moris. Tanba ne'e, ami iha responsabilidade sívika, hodi hato'o ideia balun hodi kontribui ba hariku liu tan koñesimentu sira liga ba proposta orsamentu, hariku debate sira iha Parlamentu Nasinál no ami hein atu bele mós kontribui hodi ajuda halo OJE 2025 fo resposta ne'ebé efetivu no efikáz liu tan ba povu no Nasaun nia vida.

Iha análize sira ne'ebé ami halo ba proposta orsamentu, alokasaun OJE 2025 ba setór sira hatudu disparidade boot entre setór sira. En termus karáter alokasaun, ami nota katak despezas administrativas no konsumtivas kaptura montante boot liu kompara ho despezas ne'ebé ho karáter investimentu ba setór estratéjiku sira ne'ebé sei tulun hodi redus problema estrutrante sira ne'ebé Timor-Leste hasoru. Liu-liu problema hirak ne'ebé Timor-Leste hasoru hela hanesan, problema kiak, dezempregu, insufisiénsia aihan, importasaun ne'ebé ás, qualidade servisu saúde no edukasaun ne'ebé sei mukt hela, mal-nutrisaun no menus rekursus umanus. Situasaun ne'e mak enkoraja ami hodi apresenta submisaun ida ne'e.

Ami hein katak representante povu sira nia debate iha PN bele la'o ho demokrátiku no saúdavel hodi rezulta lei OJE 2025 nian bele responde duni ba interesse tempu naruk povu Timor-Leste nian.

II. Análize ba Orsamentu Jeral Estadu 2025

A. Konsiderasaun ba Reseita


- a. Iha proposta OJE 2025, Governu propoin orsamentu total la'ós konsolidadu: US \$ 2.617.170.234, no total konsolidadu US \$ 2.072.981.000.
- b. Fontes Orsamentu ba OJE 2025:
Total orsamentu ne'ebé governu propoin mai husi fontes sira tuir mai:
 - a. Reseitas petrolíferas: \$ 1.561.073.539
Total ida ne'e mai husi Rendimentu Sustentável Estimadu (RSE) hamutuk US\$ 551.949.714 no levantamentu liu RSE hamutuk US\$ 1.009.123.825.
 - b. Reseitas *não petrolíferas* hamutuk: US\$ 511.907.461. Ida ne'e inklui impostu, empréstimu, reseitas ajência autónomu, doasaun no saldu tejouru.

Tabela 1:
Fontes reseitas OJE 2025, Montante ho ninia Persentazen

Fontes Reseitas OJE 2025	Montante iha USD	Persentazen
Impostu	212 080 154,00	10,23%
Taxa	28 873 385,00	1,39%
Rendimentu	7 256 591,00	0,35%
Transferência	1 570 073 539,00	75,74%
RSE	551 949 714,00	26,63%
Esesu RSE	1 009 123 825,00	48,68%
Transferência exterior	9 000 000,00	0,43%
Vendas de bens e serviços	9 697 331,00	0,47%
Ativos e Passivos Financeiros	45 000 000,00	2,17%
Saldo de Gerência	200 000 000,00	9,65%
Total	2 072 981 000,00	100,00%

c. Númeru sira ne'ebé apresenta iha leten hatudu katak persentazen reseita ba OJE 2025 boot liu mak mai husi Fundu Petrolíferu, ne'ebé menus ba bebeik. Iha tempu hanesan, reseitas doméstika seidauk suficiente atu hatán ba nesesidade orsamental Estadu nian. Nune'e mós sistema ba rekolla reseita doméstika seidauk bele garante katak iha tempu badak nia laran Timor-Leste bele aumenta ninia reseitas doméstika significativamente. Levantamentu liu RSE ne'ebé ninia montante boot tebes no ninia tendensia sa'e hela deit husi tinan ba tinan, hamosu risku boot ba sustentabilidade orsamental Estadu nian.

Gráfiku 1:
Persentajens Fontes Reseita OJE 2025



B. Konsiderasaun ba Despeza

Alokasaun OJE 2025 haktuir ba kategoria sira tuir mai ne'e:

1. Saláriu no vensimentu: US\$ **474.988.165** (22.91%);
2. Bens e serviços **392.892.297** (18.95%);
3. Transferénsia públia 762.755.046 (36.80%);
4. Kapital minor 22.566.932 (1.09%);
5. Kapítal dezvoltimentu 419.778.560 (20.25%).

Hare ba alokasaun tuir kategoria orsamental, ami nota katak alokasaun OJE 2025 ba kategoria saláriu no vensimentu no *bens e serviços* hamutuk representa 41% husi total orsamentu. Kategoria transferénsia públia mesak deit representa 36.80%. Ami mós halo análize klean ida kona-ba detallu sira husi alokasaun transferénsia públia iha proposta OJE 2025 hanesan tabela Nú. 2 iha kraik ne'e.

Tabela 2:
Deskrisaun Detalla Alokasaun OJE 2025 ba Kategoria Transferénsia Públia

Break-down	Total (USD)	% ba total Transferénsia Públia	% ba Total OGE
familiares	230 310 213,00	30%	11,11%
setor publiku administrativu	160 505 558,00	21%	7,74%
instuisaun nao lukrutivus	105 303 304,00	14%	5,08%
transferénsia sosiedadi	224 917 454,00	29%	10,85%
seluk	41 718 517,00	5%	2,01%
Total	762 755 046,00	100%	36,80%


Tabela iha leten hatudu katak besik 80% husi despezas orsamental 2025 nian, fornese deit ba despezas ho karáter konsumtivu. Maske nune'e, importante atu realsa katak husi despeza sira ho karáter konsumtivu, iha mós porsaun balun ne'ebé mak bele konsidera nu'udar investimentu ba tempu naruk. Laiha dadus natón atu hatudu porsaun ida ne'e iha persentajen hira, maibé ida ne'e apresenta possibilidade katak orsamentu ba transferénsia públia bele mós ho karáter investimentu. Mai ami, dadus sira husi transferénsia públia ne'e hatudu katak iha necessidade atu revê polítika despezas Governu nian hodi orienta ba investimentu tamba hanesan gráfiku nú. 2 iha kraik ne'e hatudu, despeza ho karáter investimentu kiik lós kompara ho karáter konsumtivu.

Gráfiku 2:
Persentajen Despezas OGE 2025 Hahun ba Karatér Uzus



Iha parte seluk, alokasaun despezas kada setór tuir OJE 2025 nian hatudu katak, Governu fo liu priorida ba estrada (11.7%), administrasaun (9.8%), veteranus (9.5%), eletrisidade (9.3%), no asisténsia sosiál (8.6%), enkuantu setór ekonómiku no setór importante sira seluk hanesan saúde, bee no saneamentu no agrikultura, ladun hetan prioridade iha alokasaun OJE 2025. Ami nota ho ksolok katak edukasaun hetan alokasaun 9.2% husi total orsamentu. Prioridade hirak ne'e hatudu iha nesesidade ba revê prioritizasaun orsamental, ne'ebé bele fo tempu natón ba Timor-Leste antes tama ba presipísio fiskal ne'ebé mak inevitável, no bele sai fila fali husi presipísio fiskal iha tempu ne'ebé la naruk liu.

**Gráfiu 3:
Alokasaun Despeza Kada Setór iha OJE 2025**



(Fontes: <https://www.laohamutuk.org/econ/OGE25/graphics/2410OJE2025sectorTe.png>)

III. Fundo Petrolíferu no ameasa Precipício Fiscal


Timor-Leste oras ne'e hasoru hela dezafiu boot tebes liga ba sustentabilidade despeza pública, liuliu tamba Timor-Leste depende maka'as ba Fundo Petrolíferu hodi financia despeza Estadu nian. Dependénsia boot ne'e hatudu vulnerabilidade finanseira ba nasaun tanba reseitas doméstiku lasuficiente atu sustenta despezas tomak.

Ministério das Finanças rasik subliña katak ho tendensia despezas hanesan agora, Timor-Leste ninia fundu petróliu sei mamuk iha tinan 2035 nia rohan. Senáriu Ministério Finansas nian, iha Gráfiu Nú. 4 iha kraik ne'e, sujere katak ho tendensia ascendente ne'ebé ás liu sira nia previzaun bele rezulta fundu petróliu bele mohu sedu liu. Ministério Finanças nia análise hatete:

“Como tal, o foco principal de qualquer Análise de Sustentabilidade Orçamental em Timor-Leste está centrado na previsão da vida útil do Fundo Petrolífero. De acordo com a atual tendência de despesa, o Fundo Petrolífero deverá esgotar-se totalmente até 2035...quando o Fundo Petrolífero se esgotar, o Governo não terá receitas suficientes para desempenhar as suas funções mais básicas, como pagar

salários aos trabalhadores do setor público, realizar pagamentos da segurança social aos idosos, continuar os pagamentos aos veteranos e pagar empréstimos.” (Livru Relatóriu OJE 2025 husi Ministério das Finanças, pájina 23-24).

Gráfiku 4:
Vida Fundu Petrolíferu tuir tendensia atual



Fontes: Livru Relatóriu OJE 2025 husi Ministério das Finanças, pájina 24.

IV. Rekomendasaun

1. Rekomenda atu PN halo revizaun komprensivo ba política despezas Governu nian hodi reorienta ba setor produtivu sira: ekonomia no sosial ne'ebé halo despeza OJE fo atensaun no tau porsaun boot liu ba investimentu.
2. Rekomenda ba PN atu husu Governu hodi haree fila fali prioritizasaun orsamental sira ho di'ak, ne'ebé laos deit halo mudansa iha número no seitor maibé liu-liu atu garante katak mudansa sira iha prioritizasaun orsamental nian kontribui duni ba hasa'e Estadu nia rendementu no garante dezvoltimentu ida ne'ebé inkluzivu, ekuitável no sustentável.
3. Rekomenda ba PN atu garante katak Governu implementa duni política diversifikasaun ekonomia iha setór xáve sira ne'ebé mak hatúr ona iha Planu Estrátjiku Dezvoltimentu Nasionál (PEDN).
4. Rekomenda ba PN atu garante katak OJE 2025 alén de fo solusaun ba problema sosial no ekonomia ohin lora nian, sei bele lori mós retornu ekonomia no sosial iha tempu oin mai no halo Timor-Leste sai reziliente ba hasoru dezafiu oioin.